

दिनांक 12.03.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- मुख्यमंत्री भजनलाल शर्मा विधानसभा मांय कह्यो-कारोबार करण ने आसान बणावण माथे सरकार रो खास ध्यान-निवेश अर नौकरी धंधां ऊं प्रदेश री तरक्की व्हेला।
- जल संसाधन मंत्री सुरेश सिंह रावत कह्यो-राज्य मांय लुक्योड़ी नदियां ने ओजू जीवित करण सारू असरदार काम कर्यो जा रह्यो है।
- प्रदेश मांय काल होळी मंगलावण री तैयारियां-राज्यपाल अर मुख्यमंत्री होळी री शुभकामनावां दीनी।
- प्रदेश मांय काल मौसम मांय ओजू बदलाव रा आसार-हनुमानगढ़, जोधपुर अर नागौर समेत केई ठौड़ां हल्की बारिश रा आसार।

विधानसभा मांय राजस्थान वित्त और विनियोग विधेयक 2025 परां व्ही चर्चा रो जवाब देता थकां मुख्यमंत्री भजनलाल शर्मा माली साल 2025-26 मांय राज्य री जीडीपी 230 बिलियन डॉलर व्हेवण री आस जतायी। चर्चा रो जवाब देता थकां आज मुख्यमंत्री भरोसा जतायो के राज्य सरकार विकास रा सगळा लक्ष्य टेम सर हासिल कर लेवेला। वे कह्यो के सरकार निवेश माथे खास ध्यान दे रही है, जिण ऊं नौकरी धंधां रा मौका बधेला अर प्रदेश री तरक्की व्हेला। मुख्यमंत्री कह्यो के राइजिंग राजस्थान इंवेस्टमेंट समिट रा तैत करी ज्या 35 लाख करोड़ रुपया रा करार मांय ऊं ई महीना रा आखिर ताई 3 लाख करोड़ रुपया ऊं बत्ता रा करार माथे काम व्हे जावेला।

इण ऊं पैली, विधानसभा मांय जीएसटी संशोधन बिल, भरतपुर विकास प्राधिकरण अर बीकानेर विकास प्राधिकरण बिल पेश करी ज्या। राजस्थान वित्त अर विनियोग विधेयक 2025 माथे व्हे चर्चा मांय सिरकत करता थकां विपक्ष रा नेता टीकाराम जूली राज्य सरकार माथे लारला बजट मांय करी ज्या केई ऐलाण ऊं जुड़्या नी करावण रो आरोप माण्ड्यो। श्री जूली मौजूदा सरकार माथे राज्य री लारली कांग्रेस सरकार कानी ऊं चुलायी ज्यी केई योजनावां बंद करण रो आरोप ई लगायो। विपक्ष रा नेता अर मंत्रियां बीचे व्ही तीखी बहस पाछे कांग्रेस रा सदस्य सदन ऊं बाहर निकळ ग्या, हालांकि ई पाछे सदन मांय सत्ता पक्ष रा सदस्यां री मौजूदगी मांय तीन ई बिल पास कर दिया ज्या। खबरनवीसां सागे बातचीत करता थकां विपक्ष रा नेता टीकाराम जूली सरकार माथे बिना चर्चा करायां जल्दबाजी मांय बिल पास करण रो आरोप माण्ड्यो।

दूजी कानी संसदीय कार्य मंत्री जोगाराम पटेल कांग्रेस माथे विकास रा कामां मांय अडचन पैदा करण रो आरोप माण्डता थकां कह्यो के वा पार्टी केवल वॉकआउट रो बहानो ढूढ रही है।

राज्य रा नौजवानां ने देश-परदेस रा चोखां स्कूल-कॉलेजां मांय दाखिलां मांय मदद करण सारु चलायी ज्यी **स्वामी विवेकानंद स्कॉलरशिप फॉर एकेडमिक एक्सीलेन्स योजना** मांय थोड़ा बदलाव कर ई ने ओर बेहतर बनायी ज्यी है। उप-मुख्यमंत्री अर उच्च शिक्षा मंत्री डॉ. प्रेम चन्द बैरवा विधानसभा मांय आ जाणकारी दीनी। वे बतायो के राज्य सरकार ई योजना सारु नौजवानां मांय भांत-भांत रा तरीकां ऊं जाग जगावण री कोशिश कर रही है। उच्च शिक्षा मंत्री बतायो के चालू माली साल मांय 365 विद्यार्थी ई योजना रो फायदो लीनो, ज्यां मांय ऊं 308 परदेस मांय अर 57 देश मांय भणाई-लिखाई कर रह्या है। श्री बैरवा बतायो के योजना रा तैत माली साल 2024-25 मांय हाल ताई 106 करोड़ रुपया ऊं बत्ती रकम रो चुकारो करी ज्यो ।

जल संसाधन मंत्री सुरेश सिंह रावत सदन ने बतायो के प्रदेश मांय लुक्योड़ी नदियां ने ओजू जीवित करण बाबत् असरदार काम कर्यो जा रह्यो है। वे बतायो के करौली ज़िला मांय भद्रावती नदी ने ओजू जीवित करी जा रही है। श्री रावत बतायो के राज्य सरकार रूपारेल, साबी अर जोजरी नदियां ने ओजू जीवित करण बाबत् काम करावण सारु ई मंजूरी दे चुकी है।

देश मांय लारला 10 साल मांय दूध उत्पादन साढे 63 फीसदी बध र 23 करोड़ 90 लाख टन ऊं बत्तो व्हे ग्यो है। मत्स्य, पशुपालन अर डेयरी मंत्री राजीव रंजन सिंह आज राज्यसभा मांय आ जाणकारी दीनी। वे बतायो के साल 2014 ताई देश रो दूध उत्पादन 14 करोड़ 60 लाख टन ऊं बत्तो हो।

प्रदेश मांय होळी री धूम-धाम सारु व्हे गयी है। काल होळी मंगळायी जावेला, जद के आगला दिन चौदह मार्च ने रंग खेल र धुलंडी मणायी जावेला। होळी रे मौके मिन्दरां मांय खास झांकियां सजाई ज्यी है अर केई दिनां ऊं फागोत्सव रो सिलसिलो चाल रह्यो है। न्यारी-न्यारी ठौड़ां मिठाइयां सागे रंग, अबीर अर गुलाल री दुकानां मण्ड्योड़ी है अर भांत-भांत री पिचकारियां बच्चां रो ध्यान खींच रही है। म्हाणा कोटा खबरनवीस बतायो के वठे होळी मंगलावण सारु ज़रूरी तैयारियां करी जा रही है।

आज केई स्कूल-कॉलेजां मांय होळी खेली ज्यी। होळी रा त्यौहार ने ध्यान राखता थकां हिफाजत रा खास इंतजाम करी ज्यो है। राजधानी जयपुर मांय अभय कमांड सेंटर ऊं पूरा शहर री निगरानी राखी जावेला। ई सागे पुलिस वाळा ई लगातार राउंड लगावेला अर ड्रोन कैमरां रे जरिये निजर राखी जावेला। होळी रा त्यौहार रे मौके खाद्य विभाग री टीमां मुस्तैदी सागे खाण-पीण री चीजां मांय मिलावट करण वाळां रे खिलाफ कार्रवाई कर रही है। पाली ज़िला रा सुमेरपुर अर सोजत मांय आज साढे चार हजार लीटर मिलावटी घी अर तेल ज़ब्त करी ज्यो। राज्यपाल हरिभाऊ बागडे रंगां रा त्यौहार होळी अर धुलंडी री बधाई दीनी है। वां रा शुभकामना संदेश मांय श्री बागडे कह्यो के होळी रंगां रे जरिये उमंग अर उमाव रो दरसाव करण सागे आपसी मेल-जोल ऊं रेहवण री सीख देवे है। मुख्यमंत्री भजनलाल शर्मा ई जनता ने होळी अर धुलंडी री शुभकामनावां दीनी है। वां रा संदेश मांय श्री शर्मा कह्यो के रंगां अर खुशियां ऊं भर्यो ओ पर्व आपसी भाईचारा अर सद्भाव बधावण री सीख देवे है। मुख्यमंत्री सामाजिक समरसता सागे ओ त्यौहार मनावण री अपील कीनी।

.....

डूंगरपुर जिला रा बिछीवाड़ा हलका मांय आज एक गैर-सरकारी बस ऊबी ट्रक ऊं टकरा गयी। हादसा रे कारण बस मांय सवार दो जणां री मौके ही मौत व्हे गयी अर छह मुसाफिर जख्मी व्हे गया। बिछीवाड़ा रा थानाधिकारी कैलाश सोनी बतायो के जख्मी मुसाफिरां ने डूंगरपुर रा जिला अस्पताल मांय भर्ती करायी ज्या है। वे बतायो के बस गुजरात रा राजकोट ऊं बहराइच जा रही ही।

.....

भीलवाड़ा जिला रा मांडलगढ़ कने जंगल मांय सौ हेक्टेयर ऊं बत्ता हलका मांय लाय लाग जावण रा समाचार है। ई कारण मोटी तादाद मांय रुंखड़ा बळ गया। वन विभाग री टीम लाय माथे काबू करण री कोशिश कर रही है। जिला वन अधिकारी गौरव गर्ग बतायो के आग लागण रा कारणां री ठा करी जा रही है अर ई कारण व्हा नुकसाण री जाणकारी सारू समिति बनायी ज्यी है।

.....

प्रदेश मांय काल मौसम मांय ओजू बदलाव रा आसार है। मौसम विभाग रे मुजब काल हनुमानगढ़, चूरू, जोधपुर अर नागौर जिलां मांय केई ठौड़ां बारिश रा आसार है, हालांकि दूजा जिलां मांय तेज गर्मी रो असर रेहवण री शंका है। प्रदेश मांय ई उनाळा मांय मार्च महीना रा दूजा सप्ताह ऊं ही गर्मी रो असर बधण लाग्यो है। बाड़मेर अर जालौर जिलां मांय लगातार दूजा दिन आज पारो 40 डिग्री सेल्सियस ने पार कर ग्यो। जोधपुर, चित्तौड़गढ़, सिरौही, डूंगरपुर अर पाली मांय ई लारला 24 घंटां मांय ऊंचो-ऊं-ऊंचो तापमान 39 डिग्री सेल्सियस दर्ज करी ज्यो। राजधानी जयपुर, बारां, धौलपुर, कोटा, झुंझुनूं, अलवर अर अजमेर समेत केई ठौड़ां दिन री बगत तापमान मांय 3 डिग्री सेल्सियस ताई री बधोतरी व्ही।

.....